



UNIVERSITÄTS-
BIBLIOTHEK
PADERBORN

Universitätsbibliothek Paderborn

Ioannis S. R. E. Cardinalis Bona Opera Omnia

Tribus Tomis comprehensa

Opvscvla Spiritvalia - I. Horologium Asceticum. II. Principia Vitae
Christianae. III. Manuductio ad Coelum. IV. Via Compendii ad Deum. V. De
Sacrificio Missae. VI. De Discretione Spirituum ... Operum Eminentiss.
Cardinalis, Tom. I

Bona, Giovanni

Parisiis, 1677

Electis Dei Per Universum Orbem Dispersis Ioannes Miseratione divina
Tituli Sancti Bernardi ad Thermas S. R. E. Presbyter Cardinalis Bona
Gratiam & pacem quae superat omnem sensum.

urn:nbn:de:hbz:466:1-9969

ELECTIS DEI PER UNIVERSUM ORBEM DISPERSIS IOANNES

Miseratione divina

Tituli Sancti Bernardi ad Thermas S. R. E. Presbyter

CARDINALIS BONA

Gratiam & pacem quæ superat omnem sensum.



*H*unc libellum Vobis offero, quæ par est venera-
tione, felices animæ, vasa honoris & misericor-
dia, genus electum, gens sancta, Filii Dei desti-
nati ad gloriam ante mundi constitutionem,
qui pretioso sanguine Christi redempti, & à servitute pecca-
ti dono gratiæ ipsius liberati, ignominiam crucis non erubesci-
tis. Vobis enim datum est nosse mysteria regni cælorum,
qui non ex sanguinibus, neque ex voluntate carnis, neque
ex voluntate viri, sed ex Deo nati estis. Vos elegit Pater cæle-
stis in partem sortis Sanctorum, ut essetis sancti, & immaculati
in conspectu ejus in charitate, in quo predestinati estis, non se-
cundum opera vestra, sed secundum propositum voluntatis
ejus. Pro Vobis Dei Filius oravit, cum transiturus de hoc
mundo ad Patrem dixit: Manifestavi nomen tuum homini-
bus, quos dedisti mihi de mundo. Tui erant, & mihi eos
dedisti. Ego pro eis rogo, non pro mundo rogo, sed pro
his, quos dedisti mihi, quia tui sunt. Pro mundo autem
non oravit, quia omne, quod est in mundo, concupiscentia
carnis est, & concupiscentia oculorum, & superbia vite,
quæ non est ex Patre. Ideo non audiunt verba vite; qui de

L ij

mundo sunt: & si audiunt non intelligunt, quia animalis
 homo non percipit ea, quae sunt spiritus Dei. Et Christus
 quidem lux vera est quae illuminat omnem hominem ve-
 nientem in hunc mundum, sed mundus eum non cogno-
 vit, nec videt eum, nec scit eum, nec spiritum veritatis
 potest accipere. Hoc est autem iudicium, & causa damna-
 tionis reproborum, quia lux venit in mundum & di-
 legerunt homines magis tenebras, quam lucem; erant enim
 eorum mala opera, & omnis qui male agit, odit lucem. Quid
 si in vita, & praedicatione sua Christus lux fuit, praecipue
 tamen universo mundo in cruce resplenduit; lignum enim il-
 lud, in quo errant fixa membra morientis, etiam cathedra fuit
 docentis. Audiamus ergo quid nos doceat. Id nimirum docet
 moriens, quod docuerat vivens: qui non bajulat crucem
 suam, & venit post me non potest meus esse discipulus.
 Crucem igitur amplecti, & Christi sequi vestigia salus nostra
 est: in cruce plenitudo meritorum reperitur: & hac Christia-
 norum sublimior philosophia, scire Christum, & hunc crucifi-
 xum. Atque utinam hac principia, & documenta Vita Chri-
 stiana legentibus aperiatur Deus cor ad intelligendum, dispellens
 tenebras ignorantiae, & sanans animas languores, ut erepti de
 potestate tenebrarum ad agnitionem veritatis perducantur.
 Huius rei gratiam Deum oro, ut det illis virtute corroborari per
 spiritum eius in interiorem hominem, ut charitas in eis magis
 ac magis abundet, ut sint sinceri & sine offensa, repleti fructu
 iustitiae, Deo per omnia placentes, sine querela, & sine repre-
 hensione. Hoc votum meum pro illis est: pro me autem Deum
 precor, ut mentem meam luminis sui claritate perfundat, &
 meam imbecillitatem brachii sui potentiam confirmet, ne qui
 aliis praedico, moribus doctrinae repugnantibus reprobis efficiar.
 Vos etiam rogo amici Dei, & oves pascuae eius, memores mei
 estote in orationibus vestris, ut quod haec pagina docet, operibus
 comprobem, meisque legibus obtemperem, eo vires largiente
 qui dixit: Sine me nihil potestis facere: qui cum Patre, &
 Spiritu sancto unus est Deus, unus est Dominus, gloriosus
 & superexaltatus in saecula. Amen.